

## Rapua Te Matauranga.

Ka puta te whakaaro o nga kaumatua o te iwi Tiapani (Japanese) kia whai ratou i nga turanga o nga iwi nunui o te ao, ka whiriwhiri nga kaumata i te huarahi e mau ai nga iwi nunui o te ao i a ratou. Ka whakaritea nga tamariki hei haere ki tena wahi ki tena wahi o te ao rapu haere ai i nga mohiotanga o tena iwi o tena iwi. Ka toru tekau tonu nga tau o te pakutanga o te rongonui o te Tiapani. Ka tukutukuna a ratau tamariki ki nga whenua katoa o te ao rapu haere ai i te matauranga. Ka paahi tena tamiti i nga whakamatauranga ka hoki ki Tiapana (Japan). Pena tonu ta ratou mahi i ia tau i ia tau. I tenei tau e kii ana kua eke ki te 2,000 nga tamariki Tiapani kei nga kura nunui o Amerika, tera atu hoki etahi rau kei Ingarangi, kei Paranihi (France) kei Tiamani me era atu whenua. Kua timata hoki te Hainamana ki tera tikanga.

Me matakitaki tatou te iwi Maori ki tenei tauriri. E ki ana nga Whakatauki (22:6) "Whakatupuria ake te tamaiti i te ara e haere ai ia, a ka kaumatua, e kore e mahue i a ia." Tenei matauranga e haere rua ana, taha tangata, taha Atua. He aha ra te taumata tuturu mo te iwi Maori a te rau-tau e takoto mai nei. Ka noho ranei o tatou uri i nga nohanga o nga tangata whai-whakaaro, ka mau tonu ranei te ahuatanga o nga iwi tamariki ki a tatou. Noreira puritia te akoranga a Horomona e ki ra "Whakatupuria ake te tamaiti i te ara e haere ai ia." Kei a tatou kei tenei whakatipuranga e pupuri ana te ahuatanga mo te iwi Maori a te rau tau e takoto mai nei. Kia kaha ki te ako i a tatou tamariki. Kia manawanui ki te tuku ki nga kura nunui i nga tamariki e tika ana. Tukuna ki nga kura ako-a-ringa nga mea e tika ana mo era huarahi. Nga tamariki e hoki ana ki runga ki nga morehu oneone o ratou tipuna kimi oranga ai, kia kaha ki nga matauranga hohonu o ena o nga mahi. Nga tamariki i nga kura, whai atu koutou kia tutuki rawa te huarahi e haeretia na e koutou.

E nga rangatira, arohatia nga tamariki a te iwi katoa. Ko etahi o koutou kaore he uri. He aha koa, me ki he uri katoa no koutou nga tamariki Maori. Ara te tauira pai kei Hawaiki i whakaatu ra Te Toa Takitini (Nama 10) kua kohia e te iwi katoa he ahua moni hei mau i nga tamariki matau o era moutere ahakoa no wai